

澄城縣志卷三十

序錄

澄城縣志序

韓邦奇

澄城志成敖尹佐刻之木夫志貴明實文次之開卷一覽衆美畢見得志之體矣志蓬萊於溟海退處士於游俠非無文也飾虛車爾近見作志者徒以前人目錄分更改革務立殊稱以新耳目然益晦而不能白淆而不能真焉焉用志是故於其繪也甯素可也澄城吾西安巨邑舊無志書誠爲缺典嘉靖己酉徐尹效賢屬國子生石子道立纂著焉脫稿將梓而徐尹卒庚戌敖尹來治是邦取石子稿更加潤色大光祿谿田馬公述始末爲題辭石子復序諸前後石子勤學求志

澄城縣志

卷三十

序錄

孝廉士也澄邑繁劇素號難治敖尹爲政暇及於文事其治行可徵矣爲之序嘉靖辛亥春三月下旬賜進士出身資善大夫參贊機務南京兵部尙書前吏部右侍郎右春坊太子右庶子兼翰林院國史修撰經筵講官苑洛韓邦奇書

澄城縣志題辭

馬理

世孰爲大文獻居先文獻弗足聖明焉傳郡邑有志是謂之文山川聖明賴以著存嗟伊澄城西安巨邑迺無志文君子所急嘉靖己酉徐令效賢有志斯文採獻纂編明季庚戌敖宰佐營踵徐芳躅斯文迺成石子道立文發於質聚書攷索仍恭秉筆教諭魏子司訓二王爰加較正借敷腎腸谿田馬氏覽知攸珍是用題辭歸諸梓人嘉靖辛亥春三月穀雨日

賜進士出身中大夫南北光祿寺卿谿田居士馬理撰

澄城縣志序

石道立

敘曰夫志古國史之流也古史廢於秦而後志興焉郡邑各有志所以明典章寓政化志不作郡邑無史矣是故識治體者先之澄城久闕志嘉靖丙午邑大夫江津徐侯效賢始請諸澗源楊先生庭纂修之遽卒矣而未就也已酉春再命予小子於是作今志俾將來有攷焉夫惟王體國經野莫先於地縣之建地其輿也故受之以地理官府次舍無去守以聽政也故受之以建置秋報春祈民居迺奠故受之以祠祀時使薄斂民生迺休故受之以田賦奠土質民育才宣化必有司存矣故受之以官師名世才俊光啟後先流風丕式矣故

澄城縣志

卷三十

序錄

二

受之以人物事不以類論不以緒可以觀事變備遺亡故受之以雜志終焉藝文必有關風教政體吏習民隱者依類附錄外是卽雄篇巨什悉除不載志凡七篇今析爲二卷是歲六月四日玉泉石道立子修謹識

澄城縣志跋

石道立

玉泉子曰余爲澄城志其事則徵諸見聞採諸金石其義例則倣諸太史康對山武功志宗伯呂涇野高陵志其詳略可否余竊不自知正訛補缺則敬望後之君子志甫成徐侯卽捐館今大夫滄州敖侯慎修職方之教始入梨獲底績焉昔明道在鄂晦翁在南康皆首重志事二侯茲舉謂之善學程朱非耶嘉靖辛亥春又識

澄城縣重修縣志序

姚欽明

今

上龍飛御宇之四年余承乏捧檄至澄及入境見蕭條殘破之狀較他邑尤甚心甚愴之於稽邑乘將警風物上俗之概又缺如也一日購求得二本乃崇禎乙亥失城後署縣梁丞所重刊者梁丞應故事希省工費妄加刪削篇帙紛舛亥豕錯訛不堪寓目竊疑十步之澤必有香草豈一同之內竟無片言隻字可當傳記既而得石明經嘉靖中所撰原志乃有馬韓二先生序及其中疏章記錄班班有可觀者梁丞割裂簡率至此將誰咎哉癸未末又付兵燹天其或者不欲因陋就簡以訛傳訛乎然修復之責烏容緩邪余小子綆短汲長

澄城縣志

卷三十

序錄

三

舉一切建置修築不難勉爲惟是事關憲綱昭示來茲者未敢率爾況嘉隆以後百十餘年之中軼事又不可以不備徵文祇據乎現存株守不免失之狹考事或搜乎雜記博綜又病其未精定品欲採乎家乘任日不免失之徇獨見或出乎新裁信心又恐其多僻自非博物君子老于掌故者惡能勝其任而愉快乎余小子移牒文學周諮徵事已乃訪求史筆咸推繩烈先生先生門庭蕭索澹泊寡營諷咏人代而外宴如也余造請不獲辭踰歲月而卒業訛者正之缺者補之散軼者廣續之核而實博而雅微而顯宛而文纒纒洋洋卽古良史何以加焉後之君子倘有志于世代新故之感者更欲潤澤裒益其間則有是編在余自受事來二年於茲馳驅戎

馬之疆執掌供輸之際無食頃小得所憩而獨念茲不忘以承

國家鼎興之運文獻之重不敢不亟講耳同志者循覽斯文其知余在徵之心哉順治六年歲次己丑臯月之吉澄城縣知縣江南四表姚欽明謹

重修縣志告成齋投各上臺申文

姚欽明

順治六年八月朔日澄城縣知縣姚欽明竊照

國計民風典文攸寄治蹟邦法圖籍可稽志所由來尙矣澄城古馮翊屬邑負山依谷地瘠人愚屈指先代秀出爲艱至勝國世廟中邑太學石道立始破天荒而爲志頗能採輯舊聞搆成勝帙方之昔人勤亦至矣其時韓苑洛馬谿田兩先生

澄城縣志

卷三十

序錄

四

生撫事增賞樂爲之敘元晏題辭宣城折簡非止章斯名舉實欲風激人羣關西人文于斯爲極不可謂非兩先生左提而右挈之也思廟之初厄於回祿而攝事鄰丞借興要典潛移國帑輒自刪除因陋就簡是猶羅天鳥而鍛羽儀豢擾神物竊領珠而綴之私室也癸甲之際旋羅兵火衆人惜矣君子則否卑職于今

上四年冬入境受事爰詢舊乘灰燼荒涼徒增歎慨于是懸金廣募并得二書以彼較此固不可同年而語矣博求故實按籍興除因時制宜頗得要領其時入綠林者萬族同孤城者四家執爨前驅荷戈登雉偃武修文終未能也因念皇清肇興文命鼎運維新溥海內外野史稗官罔不弋入內

府以備採擇況縣志一書土田川原戶口阨塞以及維正之
貢軍興之需人民習尙建置沿革風教固殊總載斯冊各憲
臺膺命巡方觀風問俗率皆簡閱遺文以相時勢播仁風而
坐視殘缺罔俾興復兩載以來良獨內媿不圖遺獻近在
邦訪得邑鄉紳前東光令路世美門庭蕭索澹泊寡營諷咏
人代而外宴如也卑職造廬躬請爰任斯役歷夏徂秋遂得
告成卑職開函三復虛心詳較見其補遺正訛援古酌今其
間商榷時政如披陸公之疏塵念民瘼竟同長沙之哭稽昔
獻吉慶陽于麟濟南兩志傳播海內繼倡英風不意于今嗣
鳴大雅允稱高文不媿良史雖慙卑職捐俸之初心實關下
邑備考之掌故理合齎投仰憑垂鑒伏乞照詳施行

澄城縣志

卷三十

序錄

五

重修澄城縣志序

路世美

按澄志纂自外王父楊公庭修于諸親石氏道立二公故博
洽又得谿田苑雒兩先生爲鑒定訝鼓之誦吾知免矣後有
作者卽窮宛委蒐稗史不過如大家之續漢書組紉補綴已
耳敢變例焉矧志以傳信不信胡傳苟傳矣而猶不信則好
行小慧者本欲矜蟲魚反不辨鼠璞矣卮言副墨又安用之
我澂當明季甲戌間罹兵燹志與城俱去收復餘燼者應故
事以殘斷付剗剗余每傷之自起家東陽以至賦遂初又歷
年所修復之懷無晷不在隰桑之末也爾乃滄海桑田耆舊
凋零城郭人民已非誰復操鉛槧以從事者金陵姚侯欽明
竭來應

運百廢俱舉不期月而改觀尤念文獻之重俾余忝預茲役夫有其志之又多乎哉殫余數十年之心之見聞期不戾于舊章斯已矣昔人云孔子韋編三絕起而作春秋裕如也余家世學易於外王父雖不知春秋大義爲何在然用以不沒人善也則有之焉順治六年如月上澣匱谷老人七十翁前直隸河間府東光縣知縣繩烈甫路世美書

續修澄城縣志序

戴治

澄城當關輔之北控接延鄜屏障馮翊前拱原阜後倚山隴大谷諸河帶於左甘泉諸水環於右秀嶺羣峰靈通長壑前代置郡良有以也唐宋迄勝國皆縣之比代以來鮮有著作嘉靖間邑令徐公效賢屬明經石道立始爲志序則韓苑洛馬谿田兩先生當是時民氣耗矣俗亦稍頽焉我

澄城縣志

卷二十

序錄

六

朝順治六年邑東光令路公世美補續邑令姚公欽明稱其商摧時政如披陸公之疏塵念民瘼實同長沙之哭則澄之人民其凋殘於前代之瘡痍者可想也其用意可不謂勤與自時厥後

國家休養生息久道化成澄民止知有生之樂雖耄耄不復能道昔日困殘之狀澄士類能敦詩書說禮樂以教於鄉里黨義行巾幗完人又比比是蓋距東光續志時百餘年於茲矣初余宰斯邑徵文考獻惟東光續志二冊僅存夫以澄之耗敝如昔傷殘如昔徐姚二公乃能開創增修徵信一邑垂告百世而百餘年來城社改觀桑麻盈疇戶口蕃禮俗成科

第宦達亦復蒸蒸日盛不有志以表之余實懼焉奚啻無以步賢宰後邪癸卯春始集紳士里老共議之議既成請於大中丞畢暨各憲悉見可迺取舊志借諸紳士存其資於治當於理而明且確者裁定志稿二卷書成適余調任安康紳士請有言以弁其端惟余自戊子官澄城斯久祇懼時冀無體於理澄之人果安於余而不吾議也如是者十有餘年執掌久煩兼愧譏薄方虞無以闡文獻而光史冊所幸此邦事宜舊經熟悉又與澄之薦紳故老參互考訂此志一成疆域建置如指掌徭役田賦如列眉人物選舉忠孝節義足以彰往而興起將來職官一冊亦得緣考其治行俾澄之人知生太平之世沐浴膏澤涵濡教化視石路二君修志時不可同

澄城縣志

卷二十

序錄

七

年而語則百餘年來所以成此書者其來有自余何力之有焉然澄人殊樂予聞予之去而不無綣綣也至取前後行政爲之傳余其能與徐姚二公並哉今止書其蒞官始末次於編餘悉去之以俟後之君子

新修澄城縣志序

洪亮吉

一方之志始於越絕後有常璩華陽國志越絕先記山川城郭冢墓次以紀傳實後世志州縣者所做華陽國志則有郡縣廢置李吉甫元和郡縣志樂史太平寰宇記體例亦最善吉甫則徵引書傳不著所自樂史則全用舊說尤廣異聞而附以土產人物至祝穆方輿覽勝又采入詩文于是志之志州縣者舍地理而濫徵名宿略方域而博采詞章有去求

末流蕩忘歸者焉關中地大物博且宋敏求長安志程大昌
雍勝略等開其先以爲當有善志而世所傳康海武功志韓
邦靖朝邑志皆以意排纂漫無體例由明世書傳少出學士
大夫爭以空言相尙不重舊聞無足怪焉澄城爲漢徵縣
韋昭云徵音懲懲澄同聲後人悞爲澄縣屬若王官若元里
若南郊北郊邠新城北徵杜平等皆周秦舊邑若三門若五
泉皆後魏舊縣均有墟址可考幅員雖狹實爲三輔名縣
志創於明嘉靖中至

國朝順治六年續修然均值縣境多事之時未及精審乾隆
四十八年知縣戴君有重修縣志之請巡撫畢公因屬亮吉
爲排纂之凡四閱月成共二十卷縣第一城第二鄉第三山

澄城縣志

卷二十

序錄

八

第四川第五廟第六冢墓第七學校第八道里風俗地丁銀
糧第九職官第十封建第十一科貢第十二聞人第十三列
女第十四金石第十六藝文第十七序錄第十八一以輕重
緩急爲先後而建置省并繁簡統轄城郭鎮堡寺廟廡宇又
均采十七史地志及諸地理書皆闕者始以舊志參州志通
志補之而傳聞之未信方冊之難憑者咸無取焉蓋以信今
傳後非徒爲立異云爾時乾隆四十八年癸卯端午日序

澄城縣志序

金玉麟

地志之作亦有權輿禹貢職方夏平尙已繼而三輔黃圖華
陽國志隋書載籍列百卷之圖經唐記元和備十道之郡縣
雖其書存佚不一而其文例義攸同降至永初山川桂林風

土元豐九域淳熙三山較元奘之記西域專主道里樂史之述寰宇兼及人文爲擴爲隘可得而言關中據河嶽上游古帝王都會程大昌特撰雍勝宋敏求首志長安要亦極此幅員恣其採擷今文古事取精用宏求如周應合之獨志建康范成大之專述吳郡靡不各因方隅殫爲記載後有作者莫能外焉澄邑畿輔舊治馮翊分符倚梁山而爲屏繞洛水以如帶玉麟以甲辰承乏茲土見其土厚水淳風和俗美詳稽典府轉用慨然蓋邑之志乘創自前明秉筆者太學石道立也時徐君效賢績懋循良勤求文事揆厥大旨亦主對山武功五泉朝邑務歸簡核不事鋪張曾得舊編頗資考訂繼而國初定鼎寰海澄波姚君欽明復加修纂邑人前東光縣知

澄城縣志

卷三十

序錄

九

縣路世美靈光遺老桑苧閒身拾墜緒於微茫補前書之缺略少稱完備藉益流觀嗣是而還百有餘載戴君治于乾隆四十八年續搜廢缺泐成全書事繁而體例或疎文備而空漏未免蓋洪稚存太史孫淵如觀察身居簡牘書遞郵筒一時分校者未能詳盡不無誤豕之疑並有續晷之誦讀者惜焉庚戌夏太守李公重修郡志俾事采訪聞見所積紙墨遂多因與同人互爲商確各有纂述愧任昉地記之富徵道元軼說之存事有先資書成衆手蓋鄭許說地原本班固之書郭杜解經不外馬彪之志爲難爲易取信焉爾綜其標目各因類從茫茫禹甸分土則壤百里一邑幅輿斯廣分台爲圖瞭如指掌志圖第一澄城昔郡三門舊縣古名今治與時遞

壇星象形勝依類附見志地輿第二北徵食邑東魏築城親鄰作寨杜平名鄉倉鎮廨宇道里攸行志建置第三詩詠梁山史記沮洛浮青自灤空翠不落支幹源流屬注斯作志山川第四厥賦中下垂千古訓物產豐殖徵于瑞應薄斂輕徭欽我王政志田賦第五穎宮芹藻育此英多白鹿遺訓實資觀摩濟濟俊彥食德飲和志學校第六捍患報功祭禮維吉俎豆几筵神明有恤旁逮二氏靈而不佚志祠祀第七設官分職用佐庶猷吏箴清白尙有遺謳作爲列傳民瘼是求志官師第八秦晉之際舊爲食采後有追崇加於異代典冊有靈遺芳不墜志封建第九士先器識尤貴通經茂才異等落落羣英策名天府鄉里之榮志選舉第十古傳封蔭澤重推

澄城縣志

卷二十

序錄

十

恩天章下賁如春斯溫五花錦繡織爲龍文志封贈第十一古今人物班書作表西州後賢常璩是考嘉言懿行是則是效志人物第十二世值承平人乏奇行茹苦尙節根平天性相舟有詩臨風三詠志列女第十三金天之陵青鳥之冢渺焉陳迹蓬顆薤隴巍然存者式之珍重志塚墓第十四沒世不稱君子所疾矧有傳書何容散軼蠹老蟬乾百存什一志經籍第十五燕公碑板惟大手筆畱此豐碑蘚繡苔蝕巢而錄之韓陵片石志金石第十六詞章不載古之地理張祐金山采于樂史爲文爲詩徵信是以志藝文第十七爲卷三十爲言卅萬首之目次殿以序錄終焉玉麟守土有年謏才自愧讀爾雅而不熟問兩戒以茫然是賴諸君共成茲舉揮翰

墨以奮藻集衆美以含章綜其成者韓刺史亞熊任孝廉葆
貞分其任者王孝廉詢虞容明經恬楊明經靖邦搜求遺文
校正別字者東光七世孫布衣近溪也獨念澄志凡四修而
玉麟與徐君戴君皆蜀人豈匱谷壺梯之秀而偏於岷山江
水之間有夙契歟綜覈所及景仰彌殷殆亦佛法所謂香火
之因緣而小雅所詠桑梓之恭敬也乎咸豐元年辛亥六月

澄城縣志

卷三十

序錄

澄城縣志附錄

邀修縣志啟

金玉麟

澄城縣志修者屢矣書闕有間今所憑以考地輿之廣輪辨山川之脈絡知人文之樸茂觀物產之蕃多者則戴志存焉戴志修於乾隆四十五年體例具備而考據立說似不出洪稚存孫淵如兩先生手筆疑者久之頃府憲續修府志謀假采訪之便并修縣志搜得邑紳家藏路志二冊參觀詳較則戴志藍本之所由昉也事本草創邊付梓行特假洪孫兩先生之名而綴之以序是戴志與路志其軒輊不待辨矣茲謀續修自當考之路志參以戴志闕者補之冗者汰之謬者正之後者續之并二志爲一志獨是一邑之志一邑之史也史

澄城縣志

卷三十

附錄

一

也者所以信今而傳後也自麟筆之既投莫傳奧旨縱鴻文之具備率事陳言故稱良獨有董狐而繼起端推司馬序事實而不俚爲文辨而不華準此立言難乎爲志然而十室之邑忠信常昭百家之書師儒必讀矧左輔壯河山之氣而北徵實文獻之邦魏相臣笏比棠甘克承乃祖韓給諫疏如繩直欲正其君防墓楸原路孝子旌榮賜帶著書蘿谷張山人禮抗式廬代有名人數難更僕加以科多蕊榜壤接龍門素解三長兼明二體他時珥筆將徵著作於

彤廷此日披圖應溯釣遊於故里玉麟七年守土百里濫竿掌故攸關久觀風而問俗述明敢信期揚論以闡幽特行文本所樂爲而作吏究無暇及諸君子或退歸林下或伏處田

間子羽品高不入武城之室孟堅才富咸推文陣之師用相約以簿書毋爾音之金玉佇見搜羅分任筆削同參以公共之文章作主持於風雅在玉麟固■在官之職諸君且將名垂不朽矣

勸捐修志諭

爲勸捐修志事案奉府憲李函示同州府志修自乾隆四十五年迄今七十載未經續纂現聘河南蔣子瀟孝廉來郡纂修需用浩繁飭向各屬紳富勸捐經費等因奉此復查澄城縣志自前令戴公纂修之後七十年來亦未續修茲擬乘修府志采訪之便並修縣志業經捐廉倡捐旬日以來已得四百餘金人心好善甚屬可嘉查澄邑俗敦古處家有素封孝

澄城縣志

卷三十

附錄

二

子仁人修家傳者尙多重聘幽光潛德入邑志者豈昧鉅工除小戶窮鄉但采事蹟無庸勸捐外其紳富各家非科貢之當載卽節孝之宜書他如散賑興工修橋補路類多好善必更急公此富而好禮者之有事入志固宜捐資修志也其寂處無聞席豐自足者亦當念闡幽揚晦爲一邑之公評酌雅稟經成千年之儒史知有關於乎風化必不吝其資財此無事入志者之亦宜捐資修志也總之修志欲移風易俗而勸捐乃集腋成裘固知簡則易從不擇二三十兩亦欲多而益善何妨四五十金茲定六月初十日在縣城開局除采訪纂修各事另有專司外特請勸捐之人設勸捐之地所望諸君子依期到局努力捐資同襄盛爭勵芳型他日記載書成固都

人士之專美亦守土者之素志也

一右諭飭差分赴四鄉按名傳諭距城二三十里者限三日內傳到六七十里者限五日內傳到該差回縣赴署呈覽查核再送諭到局司事者將各紳富姓名之下原註某日知某日到依照登簿如屆期不到開單送署比差嚴傳一諭帖所開紳富歷經勸捐素皆知名署內早經酌擬應捐數目俟到局勸捐數定後先開名條銀數送署批准再行登冊如數不稱力邀至署內萬不可互相徇情轉致經費不敷公事棘手

一勸捐局立冊二本送署鈐印署內局內各存一本各紳富在局捐銀註冊後局內將原冊送署以便登入署內之冊

澄城縣志

卷三十

附錄

三

登訖發還

一捐寫後有交現銀者卽由局內依原議市平紋銀兌收其約期交銀者卽於本人名下註明某日準交以省差役

一局內立收銀冊二本送署鈐印內外各存一本收銀後將原冊送署照登發還

一收存捐銀概由局內司事經理並不得假手胥役

一局內現在約定管帳四人專司出入其火食等項或一時捐項未到暫有不敷先行借墊隨收付還

一局應送束脩等項概由署內書條取送無條不得濫支

一局內辦事受勞固不專事飲食而火食等項亦不必太苦至外來紳富預備烟茶不必定款酒席以節糜費

一局內費用火食逐日登記送署一閱蓋用圖章
一局內紙張筆墨帳局支應其文具毡被等物概由自帶
一局內桌燈竈具以及應用零星等物有可借用者暫且借
用其不便借者酌置
一局內纂修須六房查卷錄事者有事之日每日每人酌給
飯食錢壹百貳拾文至工房下鄉查勘碑蹟臨時酌量道
路遠近給發

一奉諭下鄉差役每日每名由局發給飯錢捌拾文

道光三十年六月初九日諭